

# GALETIY

Kweiboug Pawl igeiguy ven Galetiy waseg, isekes livanen Yeisuw neiweisy waklos; isimounids mwasanin, iyakelesiys. Ikous, Pawl itāvin ven babaw igeiguy, mo iyum in wanven.

Wankuyeim min-Yudiy mwasanin ineis Galetiy, sigeiguy kweitan; ilansa, “Bo ikābwag amisinap yakamiy. Yowbad ikalin nuwan wasigeis min-Yudiy yakamey, misinak. Yakamiy nag. Kukin sivinamiy Yowbad bikalin nuwan yakamiy, momwamiy kubwabwes, bukumlavags māwana min-Yudiy yakamey; ikous, bweina kusimounids waseg Yeisuw Kelis, mo Yowbad bikalin nuwan yakamiy.”

Min-Galetiy iliganes, bo sunasun ninous, peinan Pawl anilivan kweitan, tasiyas asilivan kweitan.

Wankuyeim bulagan sinap towen iyum inek Pawl, singay igeg nanon, peinan bo iyyaweids min-Yudiy tasiyas. Igeg nanon, ilel let towen, iwyeb inekes min-Galetiy, bivinis mo bikakins misinaka bisimounids Yeisuw waseg, Yowbad mo bikalin nuwan wasigeis. Awoum bibwabwes momwes o bikawes min-Yudiy asisinap; awoum.

Pawl ilivan, “Bitasimounids waseg Yeisuw mo beivag Yowbad Kululuwan anagin wwanabwein wasigeis yakids; kukin gog nag, kaleivids anagin beivag kalbaleb.”

---

## Nakabsilamaw

**1** <sup>1</sup>Yey Pawl alel milet neiw biwekeimiy min-Galetiy tayakelesiys yakamiy. O yey gunawotet akokew livanen Yeisuw Kelis. Kanig waseg Yowbad ivag mo imov. Yowbad son Natun nisekeigs gunawotet towen. Gunawotet nag isekeigs gamag mwasanin, nag; Yowbad inakaleiwag.

<sup>2</sup>Yey sigwey Yeisuw nagamag mwasanin wamaven towen, ikalin nuwem min-Galetiy tayakelesiys yakamiy.

<sup>3-4</sup>Tamads Yowbad son daGuyaws Yeisuw Kelis bo isiwiyobumiy mo itaw nuwamiy. Peinan daGuyaws Yeisuw bo itam bikanig adsinaps kalbaleb peinan, vāgan kid bikatinabweids ven towen kalbaleb waseg, peinan Yowbad nanon bo māwan.

<sup>5</sup>Mapuna bitayakawanes Tamads towen, tut nag beikous. Eimen.

### Livan anagin

<sup>6</sup>Bo igeg nanoug peinan nuwanaw nukupiyaves livānen Kelis. Kweiboug nukuliganes bo isiwyoubumiy; nagein gog kupiyaves Yowbad aygan; bo kuliganes livānen tapwāloul tobwag.

<sup>7-9</sup>Nag kwayuwein livan bwanabwein nises. Tage gamag mwasanin bo iwekeimiy, ilivānes kaleiwag kweitan moumouvit, mo isunasun ninoumiy, e, livan bwanabwein bo iyagages tasiyas.

Yowbad igaw bikatimop siwotet kalbaleb.

Kweiboug nalivan, bo kuliganes; nagein-vak bo alēl mamagina: Kukin kavel bikatilow amalivan, bisen kweitan, kadiloka beisiw keb kalbaleb waseg.

Livan bwanabwein nakageiguy wasigeis yakamiy, livan towen mound. Kukin kal bisap bikatilow livan towen, kadiloka beisiw keb kalbaleb waseg. O yey, kukin bakatilow livan towen, kadiloka baṣiw keb kalbaleb waseg. Kukin gog gum-libālab teitan bikatilow livan towen, kadiloka beisiw keb kalbaleb waseg.

<sup>10</sup>Tabta gamag ages bakanow vāgan mo bikalin nuwes, ne? Tage Yowbad aygan bakanow. Tabta baṅoy kweitan ked vāgan gamag bikalin nuwes? Adok nag. Adok baṅoy makadewen ked Yowbad inaked, vāgan bikalin nuwan yey.

Kukin gog baninuway gamag babaw ninous waseg, adok nag māwan bakanow aygan Kelis.

### Kweiboug Pawl imlavag takawein livānen Yeisuw

<sup>11</sup>Sigweyas, kadiloka kukwakins livānen Yeisuw, towen nasekeimiy; nag gamag mwasanin asilivan, nag.

<sup>12</sup>Nag teitan gamag isekeig livan towen. Nag teitan gamag ikatimlakeig, nag. Anmwānet Yeisuw Kelis nikatipel sinap towen nisekeig.

<sup>13</sup>Nukuliganes kweiboug gum-Yudiy yey, agusinap māwana tasiyas min-Yudiy asisinap, singaya ayagages Yowbad nayakelesiys, sivinag kid bayakousisa tasiyas.

<sup>14</sup>Singaya amug wasigeis sigwey min-Yudiys, singaya sivinag tammwayas asisinap.

<sup>15-16</sup>Nag gog, Yowbad nidaweig Yeisuw nawotet silmanin. Idaweig igawa inag wanuwan, peinan isiwyoubug. Bweilim babaw ikous ee... misiyamun towen mo bwein Yowbad nanon waseg, Natun mo ikamat waseg yey vāgan kid bakow livānen Natun towen, baṅoy ven kadiveiyov wasigeis.

Nag akatugan gamag wasigeis, vāgan bakow asisinap, nag.

<sup>17</sup>Nag anoun Yelusalem bakatugwan wasigeis takaweins livānen Yeisuw, nag. Tage an Alebiy asesuna, wankuyeim mo ayum am Damasik.

<sup>18</sup>Bweilim kweitoun ikous, mo an Yelusalem alokon waseg Pita, anbwabwal yey asesuna ee... yam sinawatan kweinim.

<sup>19</sup>Nag akines Yeisuw nagamag mwasanin, nag. Misinaka daGuyaws bwadan mtowen Yemes.

<sup>20</sup>Tasiyas nag ikatimlakeigs livānen Yeisuw. Mounid agulivan towen nalel, tabudabod Tamads.

<sup>21</sup>Wankuyeim mo anon an Siliy o Silisiy.

<sup>22</sup>Tasiyas min-Yudiy tayakelesiys Kelis waseg nag ikines magig, nag.

<sup>23</sup>Misinaka niliganes livāneig mamagina, “Towen kweiboug sivinan biyagageids peinan ikamliw Yeisuw nakaleiwag, tut towen mo igeiguy kaleiwag towen waseg.”

<sup>24</sup>Livāneig towen iliganes mo iyākawns Yowbad waseg.

### Yeisuw nagamag itams Pawl nageiguy waseg

**2** <sup>1</sup>Bweilim sinawatan kweivas ikous, soug Bānab mo nakakatulag nakan Yelusalem. Yey atok Titos mo nakan.

<sup>2</sup>Peinan Yowbad nikaleiwag mo an Yelusalem, anekes tayakelesiys situwāvek, nakakappul sigwey tasiyas, asekes livānen Yeisuw to nageiguy vena babaw wasigeis. Wananoug adok awoum bageiguy livan tobwag waseg; awoum bawoteta mav.

<sup>3</sup>Iliganes tasiyas, mo ilansa, “Bwein.” Nag ikaleiwags vāgan Titos bibob momwan mo bilmavag gum-Yudiy, nag. Peinan guma-Gilis towen Titos, soug nakan Yelusalem.

<sup>4</sup>Tage tayakelesiys mwasinis imeis, tayaweids tasiyas; nag iyakelesiys mound. Sivines kid bikines Yeisuw Kelis nakaleiwag bwanabwein wasigeis yākids, bikatidavimas vāgan bisenas sikaleiwag moumouvit wasigeis yakamey. Idokes kadilok bibwabwes Titos momwan mo bilmavag gum-Yudiy.

<sup>5</sup>Kapiyev sikaleiwag tasiyas. Awoum bikatilawos Yeisuw nakaleiwag mound, pinamiy yakamiy o peinads babaw yākids.

<sup>6</sup>O tasiyas situwāvek, tayakelesiys idokes guyawaw mwasanin; o yey nag bakakin guyawaw o aveiyag. Yowbad gog wamatan, guyawaw o touns askakin bo katanok-wan. Situwāvek tasiyas nag kweitan sinap ikatimweisis waseg yey, nag.

<sup>7-8</sup>Tasiyas gog ikakins kweiboug Yowbad nisek Pita nakaleiwag mo igeiguy min-Yudiy wasigeis, māwan-vak bo isekeig yey mo ageiguy tobwag ven gimgilis wasigeis; tasiyas nag ibwabwes momwes. Peinan Yowbad Kululuwan isek Pita natawtoun silmanin nawotet towen, o māwana yey gunawotet silmanin.

<sup>9</sup>E, tasiyas idokes situwāvek, Yemes, Pita, Yon, tasiyas mo ikakins amāwan Yowbad nisiwyoubug, mo iyaseles nimes, soug Bānab nakamuloul simayas tasiyas. Ilansa, “Bweina kuneis tobwag ven gimgilis

wasigeis, yakamey adok bo bakageiguy min-Yudiy wasigeis. Muwotet māwana yakamey mawotet.”

<sup>10</sup>Nag kweitan kaleiwag bisekemas, nag. Misinaka ilansa, “Kadiloka kunuwes magamag tasiyas tasimavs, vāgan bukulabes.” E, wotet townen silmanin bo iseiw nuwag.

### Ven Antiyok waseg Pawl ikan Pita

<sup>11</sup>Wankuyeim ayum an Antiyok, Pita mo inoun imekeig Antiyok waseg. Bo akan mtowen Pita, peinan ansinap kalbaleb.

<sup>12</sup>Wanmugwana bwein, peinan ikammutans siney tobwag ven tayakelesiys tasiyas nag ibwabwes momwes. Wankuyeim Yemes nagamag mwasanin mo isaps, tasiyas tapiyaveins gamag kalisiy nag ibwabwes momwes. O peinan Pita iwenes tasiyas mo isinales tayakelesiys ven mwasanin, nag ikamutans siney tasiyas.

<sup>13</sup>Simeyas tasiyas min-Yudiy tayakelesiys mo ikaylasis Pita ansinap kalbaleb. Wankuyeim Banab iyaweid-vak mamagina tasiyas.

<sup>14</sup>O peinan akin ikayal, nag isimounids Yeisuw nakaleiwag waseg, mo adibek Pita wamtes tasiyas, alana, “Yakoum Pita gum-Yudiy yak, tage tobwag ven asinap nukukow, o nukulavew sinapun Yudiy; aveiyag wawun kusimkkines tobwag ven gimgilis, kulana, ‘Kadiloka kwaylasis min-Yudiy amasinap mo bukuyakelesiys’? Adok tayyaweid yak.

### Kelis anmwānet bikidumwāluds

<sup>15-16</sup>“Vena babaw gimgilis, igaw dadub nisesus. Yakids davanuys Yudiy, nag ivag adsinaps dadub mamagina tasiyas; tage takakins dakaleiwags kweiboug na-ikadilok bikidumwal adsinaps. Misinaka tasimounids Kelis waseg vāgan bikidumwāluds. E, tasimounids Yeisuw Kelis anmwānet bikidumwāluds. Awoum bitakanow min-Yudiy dakaleiwags vāgan kid bikidumwāluds. Kweiboug kaleiwag nag bikidumwal teitan gamag, nag.

<sup>17</sup>Sivinads Kelis bikidumwāluds peinan takalbalebs yakids babaw, yakamey māwana yakamiy. Gamag mwasanin mo bilansa, “Kelis sivanan sinap kalbaleb, peinan ilabes tasiyas takalbalebs.” Adok awoum.

<sup>18</sup>Kukin bawgow min-Yudiy makaleiwag to napiyev, singaya takalbaleb yey, peinan min-Yudiy sikaleiwag nag kadilok bikidumwālud.

<sup>19-20</sup>Moses nakaleiwag kweiboug bo ikatimateig vāgan kid biyakous kaleiwag townen waseg yey, tut townen mo amov Yowbad waseg. Wanaklos Kelis, soug Kelis nakakanig vāgan sinap kweiboug beikous waseg yey; mapuna bo amov. Tage nag mwamovag tatoneig, Kelis namwamov waseg yey. Tut townen kaleivig waseg namov, peinan asimounid waseg Yowbad Natun townen nisiwyoubug, nikanig peinag.

<sup>21</sup>Awoum bapiyev Yowbad nasiwayoub townen. Awoum banineiv mwamovag kaleiwag kweiboug waseg; awoum. Magat kaleiwag kweiboug ikadilok bikidumwālud, adok Kelis bo ikaniga mav.

### Tasimounid Kelis waseg

**3** <sup>1</sup>O min-Galetiy, mamagina takabalaweins yakamiy. Kal niyabol ninoumiy? Kweiboug nukuliganes, nukusimounids Yeisuw Kelis neiweiys waklos; nagein gog bo nukunumweilovs.

<sup>2</sup>Tut gog towen sivinag katanoka youd bukwatimlakem. Aveiyag silawun Yowbad Kululuwan niwekeimiy? Silawun nag peinan kukwanawes kweiboug kaleiwag, nag. Tage peinan nukuliganes livanen Yeisuw. Bo kuliganes kusimounids waseg Kelis, mo iwekeimiy Yowbad Kululuwan.

<sup>3</sup>Yowbad Kululuwan waseg nukusilamaws sinap bwein, mo kudokes mitawtoun tatineimiy bukuyakousis kid sinap towen. Adok ninoumiy nag.

<sup>4</sup>Kweiboug abamiy igeg, Yeisuw silmanin. Adok nukukwawesa mav mimouvit towen.

<sup>5</sup>Towen nivakamumiy Kululuwan waseg nisekeimiy mitawtoun, nawotet silmanin. Tabta bisekeimiy Kululuwan peinan nukukwawes nakaleiwag kweiboug? Adok nag. Misinaka kuliganes livanen Mesay Yeisuw, o kusimounids waseg, Kululuwan mo isekeimiy.

<sup>6</sup>Ebelam kweiboug isimounid waseg Yowbad, mapuna idok tadidumwal.

<sup>7</sup>Kadiloka kukwakins siyas tasimounids waseg Yowbad imlavags Ebelam delen tasiyas, yakamiy mawana yakamey.

<sup>8</sup>Bukitab waseg nilivnek Yowbad igaw bivageimiy tadidumwals, peinan kusimounids waseg; ven tobwag gimgilis yakamiy. Kweiboug anilivan Ebelam waseg mamagina,

“Vena babaw gimgilis igaw mo bimwasaws waseg yakoum.”

<sup>9</sup>Mapuna tasimounids waseg Yowbad mo bisekeids damwasaws sods tasimounid towen Ebelam.

<sup>10</sup>Tage tasiyas sivines bikanawes Moses nakaleiwag, Yowbad mo bikamtanis. Peinan Bukitab waseg livan nises mamagina,

“Kal yak nag bukwano w livan babaw nises wabuk towen, Yowbad igaw mo bikamtanim.”

<sup>11</sup>Moses nakaleiwag nag ikadilok bikidumwal gamag, Yowbad wamatan; nag. Livan kamnat nises,

“Kal yak tadidumwal yak, peinan kusimounid Yowbad waseg, mo bukuban mumwamov.”

### Simounid kweitan; Moses nakaleiwag kweitan

<sup>12</sup>Na-ikadilok gamag bisimounid waseg Moses nakaleiwag vagan biban namwamov, nag. Misinaka bikanow kaleiwag silmanin mwamovan. Peinan kweitan livan nises mamagina,

“Takanaweins kaleiwag bo beimovs.”

<sup>13</sup>O peinan na-ikadilokeids bitakanawes kaleiwag towen, Yowbad bikamtanids; tage Kelis bo ikatinabweids, damoumouvits towen waseg, peinan tonen ikatimapuds. Kweitan lelel nises mamagina, “Yowbad bikamtan gamag kal beiweiy bikayagweg wakaligweg.”

<sup>14</sup>Yeisuw Kelis ikanig waklos vagan bikatinabweids, peinan Yowbad sivinan vena babaw yakamiy bukumwasaws simiy Ebelam. O peinan nikatigik Kululuwan bimekeids, o sivinan misinaka bitasimounids waseg Kelis mo bikayeb Kululuwan Townen vagan bimekeids.

### **Yowbad ilivnek nasiwayoub**

<sup>15</sup>Sigweyas, kadiloka kunuwes adsinaps ven watinow gimgilis yakids. Kukin kal bikaluweg nakiyay, teitan gamag ta-mawan bikatilow anilivan, nag. Mawana tanuwagan nilivnek, mawana bisesunwan.

<sup>16</sup>Yowbad anilivan moundid waseg Ebelam son tabun. Nag ilivan, “Basiwyoubumiy simwey tibum,” nag. Ilana, “Basiwyoubumiy soum tabum.” Tabun towen anmwānet Mesay Kelis.

<sup>17</sup>Yowbad isek anilivan towen. Anilivan isesun-wan ee... bweilim lakatuvas sinawatoun ikous, mo isek nakaleiwag waseg Moses. Kaleiwag towen waseg nag igidem Yowbad anilivan to nilivnek Ebelam waseg. Anilivan towen bo isigeg.

<sup>18</sup>Kukin Yowbad bisekeids dakiyays Moses nakaleiwag waseg, ta-mawan bisekeids dakiyays anilivan tonen waseg. Tage Yowbad bo ilivnek anilivan Ebelam waseg, mo isekeids dakiyays.

<sup>19</sup>Taninuways Moses nakaleiwag. Aveiyag wawun Moses nakaleiwag? Wanamug anilivan moundid Yowbad nilivnek. Tage wankuyeim mo isek Moses nakaleiwag vagan gamag bikakins asisinap kalbaleb. Wankuyeim gog neim Ebelam tabun, Yowbad mo isek nakiyay towen, peinan bo ilivnek.

Nakaleiwag kweiboug anelos wasigeis Yowbad nisek Moses vagan bikatipel bisekes gamaga babaw.

<sup>20</sup>Tage anilivan bo isek Ebelam wamatan tonen. Nag tayuwein ikatipel; nag. Yowbad anmwānet-wan nisek.

### **Moses nakaleiwag**

<sup>21-22</sup>Moses nakaleiwag kweiboug tabta bigidem Yowbad anilivan? Adok nag. Kukin bisekeid kaleiwag kwayuwein vagan biymoveid, adok anagin kaleiwag towen gamag asisinap bwanabwein.

Nag gog. Bukitab nikatigik babaw gamag yakids takalbalebs yakids, vagan kid kalisiy yakids tasimounids waseg Yeisuw Kelis mo bitakawes nasiwayoub, mawan Yowbad anilivan moundid.

<sup>23</sup>E, taninuways simounid. Kweiboug Moses nakaleiwag niyyousids, mamagina iyawanids yakids. Wankuyeim Kelis neim, tasimounids waseg, ilikuds, mo taneis wamnat.

<sup>24</sup>Mamagina kaleiwag towen imtakavateids ee... mo Kelis neim. Bitasimounids waseg Kelis mo bitamlavags tadidumwals yakids.

### Simounid

<sup>25</sup>Peinan tasimounids Kelis waseg, nag ivag sivinads kaleiwag vayuwein bintakavateids, nag.

<sup>26</sup>Tasimounids waseg Yeisuw Kelis mo bitamlavags Yowbad nitun yakids, yakamiy o yakamey.

<sup>27</sup>Kukin kal Kelis waseg ibaptays, mo bikow Kelis ansinap.

<sup>28</sup>Yeisuw Kelis waseg, yakids katanok bod yakids, takinew min-Yudiy yakamey o mina-Gilis yakamiy, takinew toulis o adok guyawaw, takinew tawaw o vinay, yakids katanok bod yakids.

<sup>29</sup>Peinan Kelis angamag yakids mo tamlavags Ebelam tibun babaw yakids, mapuna takawes dakiyays towen Yowbad nilivnek Ebelam waseg.

### Yowbad nitun yakids

**4** <sup>1-2</sup>Kuninuways guyaw teitan igaw wagwadin bikow nakiyay, na-ikadilok bikaleiwag; magina tamwey teitan natouwat towen. Kadan o taman teitan bikaleiwag. Igaw anatut bivakaein, gwad towen mo bikow nakaleiwag tonen, peinan taman kweiboug nilivnek ilana, “Igaw tutan waseg mo bikow nakaleiwag.”

<sup>3-5</sup>O yakids mawan. Kweiboug mamagina daGeileiws sitouwat yakids; tut gog towen nitamlavags Yowbad nitun. Igaw wagwadids nitakawes daGeileiws nakaleiwag ee... misiyamun towen bo ikadilok Yowbad waseg, mo ikayeb Natun, im watinow wasigeis tasiyas takaweins Moses nakaleiwag. Kudavin natan ikop mo imlavag gamag, vagan biymiyiseid angamag yakids, bitalisawes Moses nakaleiwag mo bitamlavags Yowbad nitun yakids.

<sup>6</sup>Mapuna isekeids Natun kululuwan, ilana, “Tamad!” Yakids mo talansa, “Tamad!”

<sup>7</sup>Nag magina kweiboug kaleiwag natouwat yakids, nag. Yowbad nitun yakids. O peinan Yowbad nitun yakids mo isekeids dakiyays.

### Pawl ikalin nuwan min-Galetiy wasigeis

<sup>8</sup>Kweiboug nag kukwakins Yowbad. Tobwag yowbad natouwat yakamiy. Tasiyas nag mounid yowbad tasiyas; nag. Iyyaweids-wan.

<sup>9</sup>Nagein gog bo kukwakins Yowbad, o togo mamagina ikakin yakamiy. Aveiyag wawun nukuyums kunekes amiGeileiw kweiboug? Tougwes o tasimavs tasiyas. Sivinamiy kid bukuwgavaws siwotet tasiyas. Bo igak!

<sup>10</sup>Mawan amiGeileiw kweiboug kuvnases min-Yudiy sikaleiwag, magina kuvnases yam mwasinis o tibukon mwasinis o wuwal o bulbweilim wasigeis.

<sup>11</sup>Bo igeg nanoug. Adok bo awoteta mav wasigeis yakamiy.

<sup>12-13</sup>Sigwey, bo amlavag māwana yakamiy. Singay sivinag bukumlavags māwana yey.

Nag kuygageigs, nag. Wanmugwana agukwatoun mo asekeimiy livānen Yeisuw; tage ta-kupiyaveigs, nag.

<sup>14</sup>Ta-kukwasigumigs peinan woug kalbaleb, nag. Nukutams waseg yey mamagina gum-libālab yey, o mamagina Yeisuw Kelis tonen.

<sup>15</sup>Adok kunuwes singay nitamsamwas sigwey yakamiy. Tut kweiboug magat kadilokeimiy bukugutes mitamiy bukusekeigs silmanin matag, peinan singay nukusiwyoubugs yey; tut gog towen bo kwamliweigs.

<sup>16</sup>Adok nukwamliweigs peinan agulivan moundid wasigeis yakamiy.

<sup>17</sup>Bo adibakeimiy livānen tasiyas niwekeimiy. Tasiyas ivag sivinamiy, tage tayyaweids tasiyas. Sivines kid bukupiyaves gunakaleiwag, vāgan beivag kid sivinamiy sikaleiwag tasiyas.

<sup>18-19</sup>Magat asisinap bwein, bweina bikaveiyons wasigeis yakamiy, tutan yey sigwey yakamiy tasesus, o tutan yey nases kweitan ven. Yakamiy mamagina nitug yakamiy. Bo igeg nanoug pinamiy. Igaw bukumlavags mamagina Kelis mo beitaw nuwag.

<sup>20</sup>Tage ivag sivinag sigwey yakamiy bitasesus, bagilagel wasigeis yakamiy. Tut towen bo ikubukub nuwag pinamiy yakamiy.

### Egal nag māwan Sela

<sup>21</sup>Yakamiy sivinamiy bukukwawes Moses nakaleiwag. Adok nag kuliganes kaleiwag towen.

<sup>22-23</sup>Bukitab waseg livānen Ebelam nises. Nakwav Sela vinakal. Nayuwein vin Sela natouwat yagan Egal. Egal won bwanabwein; ikop natun kudatāw. Sela vinakal, natun nag. Yowbad ilivnek, mo ikop natun yagan Aysak.

<sup>24-25</sup>Kabebay nises wasigeis vinay tasiyas asteiy. Vinay asteiy mamagina kaleiwag akweiy. Egal mamagina Moses nakaleiwag. Koy yagan Sinay ven Alebiy waseg, Moses bo ikow kaleiwag towen, isekes min-Yudiys. E, min-Yudiys siven Yelusalem, igawa ivvaluts sikaleiwag moumouvit waseg, mamagina sinyāwan tasiyas.

<sup>26</sup>Yakids dakaleiwags kweitan meinoy neim walbalab, mamagina davanuys Yelusalem kweitan, walbalab nises. Yakids nag māwan sinyāwan, bwein-wan yakids, mamagina Sela nitun yakids.

<sup>27</sup>Bweina tamwasaws, tasiyas nag. Livan nises Bukitab waseg mamagina:

“Bweina kumwasaw vinakal yak.

Natum nag; tage bweina kuwak, kumwasaw.

Peinan nitum bibabaw.

Nayuwein gog sam namwan,



nitun nag bibabaw.”

<sup>28</sup>Yakamiy maḡwana yakamey, Yowbad nitun babaw yaḡkids. Kweiboug ilivnek mo Sela ikop natun Aysak. Yaḡkids maḡwan, anilivan moundid ilivnek mo nitamlavags nitun Yowbad, yaḡkids.

<sup>29</sup>Egal ikop natun won tatonen waseg.

Sela ikop natun peinan Yowbad ilivnek; kululuwan ileb mo ikop natun Aysak.

Wankuyeim Egal natun mo ikamliw Aysak. Maḡwan magin takanaweins Moses nakaleiwag mo ikamliweids tut townen waseg.

<sup>30</sup>Ikamliweids; nag gog, peinan kweitan livan nises Bukitab waseg, mamagina:

“Kwayeb mutouwat maḡwen son natun.

Awoum natun bikow mukiyay.

Mukwav tonen natun bikow mukiyay meivek-wan.”

<sup>31</sup>Yaḡkids nag maḡwan Egal nitun, nag. Yaḡkids maḡwana Sela nitun; dakiyays moundid nises.

**5** <sup>1</sup>Kelis bo isekeids dakiyays moundid. Awoum kutams vayuwein kaleiwag moumouvit waseg, awoum.

### Kelis nakaleiwag

<sup>2</sup>Yey Pawl agulivan mamagina. Kukin bukubwabwes momwamiy mamagina min-Yudiy sikaleiwag bukukwawes. Kelis nag bilabeimiy.

<sup>3</sup>Vayuwein alivan mamagina: Kukin kal yak kubob momwam, kadiloka kuvnas Moses nakaleiwag meivek-wan.

<sup>4</sup>Bukudokes kid min-Yudiy sikaleiwag bikidumḡalumiy, nag gog, kusilbwades Kelis. Peinan kupiyaves nasiḡayoub tonen bo kukḡalouws kid.

<sup>5</sup>Yaḡkids gog tanmises Yowbad Kululuwan bikidumḡaluds, peinan tasimounids waseg.

<sup>6</sup>Yeisuw Kelis waseg, takawein min-Yudiy asinap nag bimlavag tadidumwal, nag. Tapiyavein sinap townen nag bimlavag tadidumwal, nag. Misinaka kal bisimounid waseg Kelis, binamis waseg Kelis, mamagina bikalpwakit waseg townen Yeisuw Kelis, mo bimlavag tadidumwal townen.

<sup>7-8</sup>Nukusilamaws sinap moundid waseg. Kal nisilbwadeimiy? Mo kupiyaves kid Yowbad ansinap. Peinan Yowbad nidaweimiy ansinap bwein waseg, nag beitam kweitan sinap; tage teitan gamag neiteiy ninoumiy kweitan sinap waseg.

<sup>9</sup>Yist kakit binek pwalaw avakaein, tamḡḡalan mo beilol kid. Awoum kutams kakit sinap kalbaleb waseg.

<sup>10</sup>Nanoung nises daGuyaws bilabeimiy mo bukupiyaves sinap to kalbaleb; tage Yowbad bikatimop ansinap kavel townen niyabol ninoumiy.

<sup>11</sup>Sigwayas, magat baguyes tasiyas niyakelesiys Kelis waseg ḡagan bibwabwes momwes, mogo min-Yudiy nag bikamliweigs. Tage bo

ikamliweigs peinan alana, “Yeisuw Kelis nikanig waklos vāgan bikidumwāluds.”

Kukin gog badibakes tobwag ven gimgilis, “Kadiloka bibob momwamiy, vāgan bukumlavags min-Yudiy yakamiy,” mo beibwein ninous min-Yudiy tasiyas. Nag gog, min-Yudiy bo ipiyaves agulivan townen, livānen Yeisuw neiweiys wāklos.

<sup>12</sup>Tasiyas sivines bibwabwes momwamiy, bweina bikablaves powes tatineis.

<sup>13</sup>Sigwayas, Yowbad nidaweimiy nakaleiwag kweivaw waseg. Bo ikous movitan kaleiwag kweiboug wasigeis yakamiy. Kal yak bukutam kaleiwag kweivaw mo beibwein nanoum. Awoum kaleivim bikaluweg nanoum, awoum. Tage siwayoub bikalawageim vāgan bukuvnāses simiyas.

<sup>14</sup>Livan katanok bo kadilok kaleiwag babaw. Livan townen mamagina, “Kadiloka kuvnas soum māwana kuvnāseim tatoneim.”

<sup>15</sup>Tage beivag kakat wudoumiy, bukuygages simsimiyas, adok bukuyakousis bod yakamiy.

#### **Kululuwan anagin kweitan, kaleivin anagin kweitan**

<sup>16-17</sup>Sinap townen kunages: Magat Yowbad Kululuwan bikaluweg ninoumiy, ta-māwan kalivimiy bikalawageimiy. Peinan kaleivid sivinan bisilbwed Yowbad Kululuwan nakaleiwag, o Kululuwan sivinan bisilbwed kaleivid nakaleiwag; mamagina ivvatays, mapuna aveiyag sivinad ta-māwan bitawtel.

<sup>18</sup>Magat Yowbad Kululuwan bikaleiwag mo biyakous Moses nakaleiwag wasigeis yākids.

<sup>19-21</sup>Takinbunikes kaleivid nawotet mamagina: kanavay mav, subwan, kalimwāsaw, meg, bwagaw, kameiliw, kamniman, moumouvit dabad, kavikun, gidukis, silponay, silakod, sinal, kananeiy, govek, o sinap mamagina tasiyas imwamoums wiskiy mo imlavags takabalāweins tasiyas. Kweiboug nadibakeimiy, kweivaw bo alivan-vak māwan: Tasiyas māwan asisinap kalbaleb nag beisiws Yowbad wanakabkaleiwag, nag.

<sup>22-23</sup>Tage Yowbad Kululuwan nawotet mamagina: siwayoub, mwāsaw, niwal, kapatul, sinap didumwal, guyaw, simounid, mānum, sinap kamnat. Nag kweitan kaleiwag bitawtoun waseg sinap townen bwanabwein.

<sup>24</sup>Magat Yeisuw Kelis angamag yākids bo nitaweiyis kaleivids waklos vāgan kid kaleivids ansinap kalbaleb nag bikaleiwag wasigeis yākids.

<sup>25</sup>Kukin Yowbad Kululuwan biymoveids, kadiloka bikaluwegeids, mamagina dakavaveis Kululuwan Townen.

<sup>26</sup>Awoum bitakayapam. Awoum sivinad gamag babaw bikavasid o bigoulud; awoum. Adok sidayas mo bimouvit dibes o bikamliweids. Awoum bitavages māwan; awoum.

### Bitalabes sidsidayas

**6** <sup>1</sup>Kukin bwadads teitan bikalouw, ansinap kalbaleb bivag, kadiloka kukidumw<sub>al</sub>us gamag townen, Kululuwan Yowbad wasigeis yakamiy. Kadiloka kum<sub>an</sub>ums gamag townen beibwein, siwayoub waseg. Tage kuvn<sub>ase</sub>imiy-vak, mata ge bukukwalouws yakamiy.

<sup>2</sup>Kulabes simsimiyas waseg aveiyag kalbaleb bukulivatus. Kuv<sub>age</sub>s ma<sub>wan</sub>, peinan Kelis nakaleiwags.

<sup>3</sup>Magat teitan ansinap nag, idoki sinap bikaypom kid, singaya ibol nanon tonen; ikatidavina tonen.

<sup>4-5</sup>Tatanok tatanok yakamiy kadiloka binuway ansinap totonen. Kukin bwein, mo beibwein nanon. Awoum binuway son ansinap. Peinan bitakawes kwanads tatoneids, tatanok tatanok ya<sub>kids</sub>.

<sup>6</sup>Kukin teitan bikatimlakeim sinapun Yeisuw Kelis waseg, kadiloka kusiwyoub taw townen youda babaw bwanabwein waseg.

<sup>7-8</sup>Awoum teitan bikatidavimiy. Ta-ma<sub>wan</sub> bukubob Yowbad nakaleiwag. Aveiyag bukusop, youd townen mo beisob. Kukin bukusop kaleivim waseg, igaw bukuta<sub>yoy</sub> youd kalbaleb, ipsa<sub>pwas</sub>. Kukin bukusop Yowbad Kululuwan waseg, igaw bukuta<sub>yoy</sub> mumwamov townen bises bisigeg.

<sup>9</sup>Awoum bitasoumats dawotets bwanabwein waseg. Bitavvaluts, nag bikawegweis wouds ee... ta<sub>yoy</sub> anatut mo bitata<sub>yoy</sub>s anagin bwanabwein.

<sup>10</sup>Mapun kadiloka bitalabes gamag tababaws-wan, peinan adatuts nises. Singaya bitalabes sidayas tasiyas nisimounids daGuyaws Yeisuw waseg.

### Livan nakabiyokous waseg

<sup>11</sup>Kukines lelel singay avakaein yey nalel namag waseg.

<sup>12</sup>Min-Yudiy nikamliweids peinan adlivans mamagina: “Tasimounid waseg Kelis neiweiys waklos, mo Yowbad bikidumw<sub>al</sub>ud.”

Gamag mwasinis isimkineimiy vagan bibwabwes momwamiy. Sivines kid youd bwanabwein ankakin watoulan. Kukin bukubwabwes momwamiy, mo beikous sisiyas askameiliw wasigeis tasiyas.

<sup>13</sup>Tage tasiyas nibwabwes momwes nag ivn<sub>ases</sub> min-Yudiy asisinap meivek-wan; nag. Sivines kid bibwabwes momwamiy vagan bikaypamweimiy yakamiy.

<sup>14</sup>Yey gog awoum bakaypom. Misinaka bakaypom anklos daGuyaws Yeisuw Kelis. Anklos waseg mamagina ven watinow sinapun bo ikanig, mo iyakous nakaleiwag waseg yey; o yey gog waninous ven watinow gimgilis mamagina takanig yey.

<sup>15</sup>Min-Yudiy sikabivatus nag bilabeid; vena babaw asisinap nag bilabeid; misinaka sinap kweivaw, vagan bitamlavags gamag kweivaw.

<sup>16</sup>Tayyousins sinap towen yakamiy Yowbad binok nuwan wasigeis yakamiy mo beita<sup>w</sup> nuwamiy, simiyas Yowbad inabod kweivaw, mamagina min-Yisleil babaw yakids.

<sup>17</sup>Igaw tut wanakoug<sup>w</sup>aw awoum teitan bivag gunamouvit. Bo misinak! Yeisuw peinan, agupout nises wakaleivig.

<sup>18</sup>Sigweyas yakamiy, daGuyaws Yeisuw Kelis bisiwayoub kululuwamiy waseg. Eimen.

Yey Pawl.